

DE CONSTITUTIONIBUS CAPITULARIBUS

AN. 1764 CONDITIS

PRAEMISSA

Constitutiones capitulares nostrae, quas nunc observare debemus, sicut omnibus compertum est, in Capitulo generali, anno 1764 Paganis habito, congestae et approbatae, et a Capitulo romano an. 1855 pro Congregatione transalpina acceptae et praescriptae sunt. Observantia proinde regularis, quam nunc tenere obligati sumus, substantialiter in his Constitutionibus fundatur, quae propterea historice et practice maximi momenti sunt.

Neminem vero fugit, has Constitutiones, hodie, post 190 quasi elapsos annos, et post tot tantasque rerum mutationes, quae interea totum terrarum orbem affecerunt, aliqua indigere revisione ut melius modernis necessitatibus adaequatae in adiunctis nostrorum temporum religiose observari possint.

Defunctus Rev.mus Pater, ut omnes bene sciunt, huic tam gravi quam inevitabili quaestioni summam impendebat animi cordisque attentionem, cum ipsa Sancta Sedes his temporibus sic dictum « aggiornamento », id est opus adaequandi, omnibus religiosis familiis tamquam opus nunc necessarie aggrediendum perficiendumque proposuisset. Si autem aliquando in nostra quoque pia familia ad hanc operam, summae responsabilitatis plenam, perveniendum erit, quaestio de Constitutionibus capitularibus an. 1764 cum tota sua gravitate apparebit. Haec bene perpendens, R.mus P. Buijs se ipsum de hac quaestione bene informatum esse cupiebat, eo vel magis, quod non deessent qui de dictis Constitutionibus dubia variae naturae movissent (cfr. *Analecta* 23 [1951] 172, 196-197).

Quae cum ita essent, P. Generalis duos elegit Patres suae fiduciae, in rebus historicis nostris probe versatos, Patres scilicet O. GREGORIO et R. TELLERÍA, quibus commisit quaestionem de Constitutionibus capitularibus an. 1764 examini historico-critico subiciendam. Et quidem RP.i Gregorio breviter studere debuit ipsi historiae externae Capituli an. 1764, et profundius naturae historico-iuridicae Constitutionum in ipso Capitulo confectarum, utrum enim veram vim iuridicam formalem induissent inde a principio, vel tantum ex eo quod postea ab altero Capitulo generali an. 1855 acceptae et praescriptae fuerunt, quo studio peracto laudatus P. Gregorio

ad hanc conclusionem pervenit: valorem iuridicum Constitutionum an. 1764 indagazione historica omnino probatum esse et quidem inde ex ipso eodemque Capitulo dicti anni 1764; actio enim capitularis canonicè inoppugnabilis est, de Constitutionum promulgatione et acceptatione constat, ipsaeque in Italia a subditis observabantur et a superioribus ex officio exigebantur, caute tamen, quod ex calamitosis rerum adiunctis eorum temporum exagerrati regalismi facile comprehenditur.

Alius vero studiosus, RP. Tellería, indagare debuit in fontes historicos ipsarum Constitutionum an. 1764, videre scilicet undenam Patres Capitulares dicti Capituli generalis Constitutiones quas condiderant, desumpissent, utrum omnino novae fuissent, vel potius, quod vero similis appareret, ex variis praecedentibus normis, usibus, consuetudinibus desumptae. Indagatione historica sibi commissa diligenter peracta, RP. Tellería probare potuit, Constitutiones an. 1764 re vera maxima ex parte derivatas fuisse ex multiformis praexistentibus, primaevis et subsequentibus, de observantia regulari adnotationibus, tunc in unum corpus redactis et congrue amplificatis.

Rev. mus Pater, duobus his studiis attente examinatis, cum ad fundationem *Spicilegii historici* perventum fuerit, ea in primo fasciculo edenda esse praecepit, id quod hisce perlibenter exsequimur.

Haec pauca vero opportunum credidimus praefari, ut fratres pondus et valorem sequentium studiorum, secundum mentem R. mi Patris Buijs b. m., recte et attente aestimare valeant.

N O T A

Pro ulteriori studio observantiae Constitutionum Capituli generalis an. 1764 in Congregatione Transalpina omnino conferatur liber RP. EDUARDI HOSP, *Geschichte der Redemptoristen-Regel in Österreich, 1819-1848. Dokumente mit rechtsgeschichtlicher Einführung*; Wien, C. S. R., 1939; 8°, 337 et recens studium RP. ADRIANI DANKELMAN, *Heeft Wittem ons de latijnse vertaling van de Constitutie van 1764 gegeven? [Estne versio latina Constitutionum a. 1764 facta in Wittem?]*: *Monumenta Historica. Bijdragen tot de geschiedenis van de Nederlandse Provincie der Redemptoristen* 5 (1953) 115-120.

Deo favente speramus fore ut anno proximo lucubratio de historia cognitionis et observantiae Regulae et Constitutionum in Congregatione Transalpina, sicuti ex manuscriptis conservatis et editionibus factis, ex documentis officialibus ac epistolis congregatorum deduci potest, in lucem edi queat.

SOCII REDACTIONIS